

## **Èkwo k'èbo, Pyita deru**

<sup>1</sup> Èkwo-ozì-wa shì l'èka mbèdua, bụ Sáyìmonu Pyita. Mu bụ onye ejeru Jisọsu Kuráýisutu ozi; bya abụkwaruphu onye ishi-ozì iya.

Ndu mu ede iya anụ bụ unubè ndu ono, kwetaru woru onwunu ye Nchileke l'èka ège ono, ayìbedua kwetakwaruphu ono. Ekwekwe ono, ayì l'ayi ha kwetaru ono bè shì Jisọsu Kuráýisutu l'èka. Jisọsu Kuráýisutu ono bụ Nchileke; bya abụkwaruphu Onye Ndzọta ayì. Ọ kwa l'o nwenukaru obu-ọma; meru iphe o kwetaru t'ayi l'unu tuko kwetakota nk'ìya ẹnyanhamunha.

<sup>2</sup> Mu ekfukwaru Nchileke t'o mee t'unu kafua ọmaru yèbe Nchileke; yo mekwaaphu t'unu kafua ọmaru Nnajiufu ayì, bụ Jisọsu ọgbodo amaru eje. T'eze-iphe-ọma; mè ẹhu-agu, shì iya l'èka rubekwa unu ẹka; yo rubekwa iya k'etsushi iya.

### *Nchileke kuru unu; fọta unu*

<sup>3</sup> Ayì maru Nnajiufu ono; maghee ya amaghe; mbụ onye ono, bụ iya kuru ayì t'ayi bya t'ayi l'ìya gbaru mgba l'ọdu-biribiri iya; mè l'iphe-ọma ono, ọonoduje eme ono. Ọ bụ amama ono, ayì maru iya ono bè Nchileke shì gude eze ike nk'ìya; nù ayì iphe bụ iphe mkpa iya duru ayì l'ọ ha; t'ayi gude nọduru iya ndzụ; l'emekwaphu

umere, ekoshi l'ayi akwabe iya ugvu. <sup>4</sup> O bu eze ike iya ono b'o gudekwaphu kweshia ayi ukwa iphe, dukota mma ogbodo adudu; mbu ukwa iphe kariru otu onu iya. Oo ya bu k'ophu unu e-gudekwanu k'ukwa iphemiphe obule ono, o kweshiru ayi ono ghaaru omebyishi onwonye ono, ndu mgboko-a emebyishi onwephe ono azu. Ishi iya aburu l'ephe eyeebeje onu l'egu ejo iphe anoduje agu ephe. Unu gudekwaphu k'iphe ono, o kweshiru unu ukwa iya ono t'unu le Nchileke gbaru mgba meje umere oma ono, oome ono. <sup>5</sup> Oo ya bu t'unu kebeje ehuru see t'unu meje umere oma yekwa l'ekwekwe, unu kweru ke Nchileke. Iphe, unu e-yekwa l'umere oma ono aburu omu t'iphe dojee unu enya. <sup>6</sup> Iphe, unu e-yekwa le k'iphe-odo-enya aburu t'unu kpadeje onwunu. Iphe, unu e-yekwa l'okpade onwonye aburu otaru iphe nshi. Iphe unu e-yekwa l'otaru iphe nshi aburu t'unu kwabeje Nchileke ugvu. <sup>7</sup> Iphe, unu e-yekwa l'okwabe Nchileke ugvu aburu oyeru unwunna, unu l'ephe tuko ye onwunu l'eka Kurayisutu obu. Iphe, unu e-yekwa l'oyeru unwunna obu aburu t'unu yeru onyemoneye obule obu. <sup>8</sup> O -buru l'egbe umere ono be unu hawaru to buru ura, raruru unu; be unu ta abuhakwa 'o-ga-le-mkpa. Yo gbe mee t'amama, unu maru Nnajiufu ayi, bu Jisosu Kurayisutu ka unu ore ire l'ehu. <sup>9</sup> Teke bukwanu l'o nweru onye woru onwiya ye Kurayisutu l'eka; iphe ono kpamukpamu t'erubewa iya eka; onye ono dukwa lo bu onye ishi; mbu l'onye obu ta aphudu uzo. Onye ono be gbekwanu zahawanu lo Jisosu be safukotaru iya iphe du eji ono,

o metakotaru kpube onwiya teke ono, ẹ too woduaru onwiya ye Kuráýisutu l'ẹka ono.

<sup>10</sup> Oo ya bụ; ụnwunna mu; ọ kwa unu bụ ndu Nchileke kuru; fọta unu; bya emee unu; t'unu bụru ụnwu iya. O bụ iya kparu iphe unu e-kebeje ẹhu eme t'unu gude umere unu ekoshi l'unu bụphu ụnwu iya ọbu l'oswiya; lẹ teke unu emewa iphe ono l'ọ ha bẹ ẹ-to nwehekwa l'unu eshiswee ụzo. <sup>11</sup> O -bụru l'unu emewa iya ẹge ono b'ẹ tọ duhekwa iphe a-nọ-chighe unu ụzo t'unu ba abahushi l'ẹke Nnajiufu, bụ Jisọsu Kuráýisutu bụ eze gbururu jeye; mbụ Jisọsu Kuráýisutu ono, bụ iya bụ Onye Ndzọta ayi ono.

<sup>12</sup> O kwa iya kparu iphe mu eme tẹ mu nyatajẹkpeleruphu unu iphemiphe ọbule ono; ẹ guderu l'unu makotawaru iya; bya evudoshiwa ike l'ọkpuberu okfu ono, e ziru unu ono. <sup>13</sup> Mu arị l'ọ ka mma tẹ mu nyatakotaru unu iphemiphe ọbule ono nta-a, mu nọkwadu-a ndzụ-wa; gude iya yeshiru unu ọkú. <sup>14</sup> Ishi iya aburu lẹ mu marua l'oge nka-ezekuna mu eruwa; bụ iya bụ ẹge Nnajiufu, bụ Jisọsu Kuráýisutu koshiru mu. <sup>15</sup> Mu e-keshikpelephu ẹhu anyataru iya unu; k'ọphu bụ l'unu ta azahahedu iya azaha; mbụ je akpaa lẹ teke mu ta nọhedu.

### *Ugву, Nchileke kwabẹru Kuráýisutu*

<sup>16</sup> Lẹ teke ayi ziru unu k'ike Jisọsu Kuráýisutu, bụ Nnajiufu ayi; mbụ iya bụ ike ono, oo-gude bya ọdo ono; b'ẹ tọ bụkwa akọ-ife, madzụ ritaru l'oriri iya; bẹ ayi kọru unu. Ayibedua gudekpokwaa ẹnya ayi phua ọdu-biribiri iya.

<sup>17</sup> Ayi l'iya tukuru nọdu l'ẹke ono teke Nchileke

kwaberu iya ugvu; bya anu iya odu-biribiri, du egvu; teke olu, shi l'odu-biribiri ophu kakota nu suru: "Owaa bu Nwata iya ke nwoke, ya yeru iya obu. Oomeje; ehu atso iya ena." <sup>18</sup> Ayibedua nukwaru olu ono, shi l'imigwe kfu iphe ono; ke l'ayi tsokwanu nodu l'ugvu ono, du nso ono.

<sup>19</sup> O kwa iya kparu iphe ayi kafuaru okweshi ike; l'iphemiphe obule ono, ndu nkfuchiru Nchileke kfuhawaru ono be bukota okpobe okfu l'o ha. Unu ngabejekwa nchi; mee iphe ephe kfu; l'o butukwaa ya phu bu l'unu eme ohuma. Iphe obu bu l'ozi ephe ono be bu iphoro; nodu le mgboko-a, iphe du eji meru; yo gbahukota oswi ke tsabalangu-wa. Iphoro ono a-nodulephu jeye nchi abohu; Kurayisutu abya odo. Kurayisutu ono a-dulephu l'o bu mkpoko-podo nchi-abohu, anoduje echi pamupamu le gerigeri nchi-abohu. Oo-me; iphoro iya ono angakota unu obu. <sup>20</sup> Obenu l'ophu katsukpo nu, bu ophu unu e-bebekpoodu maru bu le to dudu onye a-du ike gude uche k'eka iya maru iphe iphe ono, ndu nkfuchiru Nchileke deru l'ekwo okfu Nchileke ono bu. <sup>21</sup> Ishi iya aburu l'ozi ono, ndu nkfuchiru Nchileke shi anoduje ezi teke ndiche ono ta budu iphe ephe ritaleruphu l'uche ephe. O bu Ume-du-Nso edu ephe; ephe ekfu okfu, shi l'eka Nchileke.

## 2

### *Ndu ejo nzizi*

<sup>1</sup> Le teke ndiche b'o nwejehaakwaru ndu suru l'ephe bu ndu nkfuchiru Nchileke l'eke ndu

Ízurelu nọ; l'ẹphe ẹ-ba bu iya. O kwaphu ẹge ono b'ọ du nta-a. O nwekwaru ndu a-nọdu l'ẹke unu nọ; sù l'ẹphe bu ndu ezi ọkpobe okfu ono; l'ẹphe ẹ-ba bu iya. Yọ buru ọkpobe okfu ono bẹ ẹphe gude ẹregede gwakọbe iya ẹjo-ire. Iphe bu onye -kwetaru ẹjo-ire ono; yo mee onye ọbu: yọ laa l'iyi. Ndu ẹjo-ire ono a-jikatsuaru jika Nnajiufu ayi, bu Jisọsu, bu iya gbafutaru ẹphe l'ẹka iphe du ẹji ono, ẹphe shi eme ono. O bu iphe ono meru iphe, iphe du ẹji, ẹphe meshiru a-tukoru ẹphe l'ishi; ẹphe alaa l'iyi ẹgwegwa.

<sup>2</sup> Ikpetuma madzụ e-mekochaa tsolahaa ẹphe; melahaa ẹjo ememe. Yọ buru iphe ẹphe a-nọdu emeebetsua bẹ ndu ẹ-ta bu du ndu kẹ Nchileke e-gude wata okfubyishi ọkpobe okfu ono, bu iya bu ọzo kẹ Nchileke ono, ayi etso ono ekfubyishi.

<sup>3</sup> Ndu ono, anọduje ezi unu iphe ẹ-ta bu du ọkpobe okfu ono bẹ bulekwaphu ẹkpiri okpoga bẹ eshitaje ẹphe ifu. Ẹphe -gbeshi; ẹphe atuko ẹjo-ire, nọ lẹ mgboko dzushia wushiru unu. Ẹphe eshi ẹge ono; ghotu unu l'ugho; ria unu ọkpobe okpoga. Obenu l'ẹ ta anọhekwa ọphu baru nwishi; Nchileke anma egbe ndu ono ikpe. Ishi iya aburu lẹ Nchileke kfuhawaru iya ru teke ndiche l'iphe ono, bu iya e-gbu ẹphe ono t'ekujekwa mgbenya.

<sup>4</sup> Unu nyatakwa iphe Nchileke meru teke ndiche. Lẹ Nchileke ta ahakwa unwu ojozi-imigwe, meru iya iphe du ẹji t'ẹphe riru iya. O turu ẹphe chee l'ọku alı-maa. Ẹke ono b'a turu ẹphe mkporo dobe l'ẹke, ọchi gbaru tsabalangu t'ẹphe nọdu ngaberu mbọku ikpe. <sup>5</sup> O kwaphu ẹge ono bẹ Nchileke ta hadu ndu ono, meru

iya ejo iphe teke ndiche ono t'ephe righaru iya; gbahaa l'o gude utso bya atuko unwu eliphe rigbushia; okfu l'ephe te yeduru yebe Nchileke ugvu. Ndu o dzofutaru abuleruphu Nowa ye l'umadzu esaa odo kpui. Nowa ono raru iya ndiphe arara t'ephe nujeru Nchileke okfu. <sup>6</sup> Nchileke abyakwaphu bya anma Sodomu me Gomora ikpe; mee ya; oku adzufukota iya; yo buru ntu; chihu le mgboko. Iphemiphe obule ono be Nchileke meru; gude koshi ndu e-ta akwabedu Nchileke ugvu egbe iphe ya e-me ephe. <sup>7</sup> Yo buleruphu nwoke lanu; mbu Lotu be Nchileke dzoru l'ali ono, ndu eme ejo ememe bu ono. Lotu ono bu onye doberu aka ndoo l'ifu Nchileke. Umere ono, rehuru erehu, ndu ali ono shi anoduje eme ono eshi akpoje iya mgbenya. <sup>8</sup> E to nwedu mboku, mutaru amuta, nwoke ono te shiru aphurushije enya; anughashi nchi l'ejo ememe, ndu ono shi anoduje emeebe; k'ophu bu l'ejo ememe, o shi egudeje enya phua; me ophu o shi anuje le nchi shi anoduje ahushi iya oku ike l'obu; ke l'o bu onye e-ta dudu eke, aata iya uta. <sup>9</sup> Ono ekoshi le Nnajiufu marua ege ooshije dzoo ndu, woru onwephe ye iya l'eka; e ege o shi yeru ephe eka; t'ephe nahu iphe-ehuka, byakfutaru ephe. O makwaruphu ege oo-shije tuchia ndu eme iphe du eji l'eke ephe a-nodu jeye mboku ikpe; t'a nua ephe aphu. <sup>10</sup> Iphe ephe anoduje achu bu t'ephe mee iphe, bu iphe, egu iya enwu ephe raphuraphu l'ehu; gude merushia onwephe.

Ndu ejo nzizi ono agbabeje okpa l'ali; l'eku onwephe ebyi; buru ndu e-ta atsujedu egvu

okfubyishi ndu ono, ẹ ta aphujedu l'ẹnya l'o-gbu-nwji-nwji imigwe ono.

<sup>11</sup> Unwu ojozi-imigwe kakwa ndu ono ike ogbodo akaka; kakwaphu ẹphe onweru Ume. Obenu l'ẹphe te ejejekwa je anọdu l'ifu Nchileke ekfurushi ẹphe; l'ẹphe meru ẹji. <sup>12</sup> Iphe bu ndu ono, anọduje ezi iphe ẹ-ta budu okpobe okfu ono dulephu l'ọ bu anu-egu-egbudu, ẹ-te nwekpodua egomunggo le phuu. Amumu, a mushiru iya le mgboko-a bu t'ọ bya anọdu t'a hajẹ iya l'onya; gbua. Ọ bu iphe ẹ-te dodu ẹphe ẹnya be ẹphe egudeje ekfubyishi ekfubyishi. Yo buru ẹge eegbuje anu-egu-egbudu; bu ẹge eegbu ẹphe; ẹphe alaa l'iyi. <sup>13</sup> Ono aburu uru, ẹphe e-rita l'ejo iphe ono, ẹphe yeru ẹka ono ndono. L'echi oke-eswe labu be ẹphe anọdujelee eme t'ẹphe ria iphe ono, ẹgu iya enwu ẹphe raphuraphu l'ẹhu ono; iphere taa du ẹphe. Ẹphe eme iya; yo tso ẹphe. Ẹphe bukwa iphere noduru unu; m'ọ -buru l'unu a-hajẹ ẹphe t'unu l'ẹphe tuko eri nri teke unu dokoberu eri nri. Ẹphe -nọdu; ẹphe ajakposhi unu; unu ta amaru l'ẹphe aghoru unu ugho. <sup>14</sup> Ọobuje; ẹphe -gude ẹnya phu nwanyi; yo go ẹphe t'a su l'ẹphe le nwanyi obu zewaru. Ẹ to dudu teke ẹgu ome ejo iphe agu-buhuje ẹphe agu-buhu. Nta-a nta-a; ẹphe edetawa ndu ophu ẹ-ta noshidu ike l'iphe ẹphe kweru; ẹphe adaaru ẹphe l'onya. Iphe doru ẹphe ẹnya bulephu ẹge ẹphe e-shi kpaa okpoga. Ono be ẹphe metawaru; yo ria ẹphe ari ẹhu. Obekwanu le Nchileke tuwaru ẹphe onu. <sup>15</sup> Ẹphe paru okpobe uzo ono, vudo nhamunha ono haa; l'agha ririri. Ẹphe emewa egbe umere,

Bélamu, bú onye nkfuchiru Nchileke meru teke ndiche. Bélamu ono bú nwatibe Bósoru. Iphe Bélamu shi yeru ẹnya teke ọ nọ búlephu okpoga. O yetaberu okpoga ẹnya; k'ọphu bú l'ọ shi abuje: ọ -phụchachaa iphe dụ ẹji; ọ -mawaru l'okpoga e-ru iya ẹka mẹ ya -mee ya; yo jelee je emee ya: tẹ ya chita okpoga ria. <sup>16</sup> Nchileke abya abaaru iya mbà iphe ono, oome ono; l'ọ kwa iphe dụ ẹji bẹ oome; l'ẹ to kwedu anuru yẹbe Nchileke okfu; to nwe ishi. A nonyaa; nkakfu-igara, a machacharu-a l'ẹ too kfujedu okfu; ekfua okfu l'ọ bú madzụ; t'e gude kpọshia onye nkfuchiru Nchileke ono ome umere onye ọgvu ono, ọcho ọzo ememe ono.

<sup>17</sup> Ndu ono, ezi iphe ẹ-ta búdu ọkpobe okfu ono bú 'ọ-ga-ẹ-mkpa bẹ ẹphe bú. Ẹphe dụ l'ọ bú nwogvu, mini tahuru. Ẹphe adụkwaphu l'ọ bú egbe iya ọwaa, abuje: igwe -ruebe eruru k'ọchi mini; pherephere ephekashia ya-a. Nchileke bẹ nmaakwaru ẹphe ikpe. Ẹke ẹphe a-nọdu bẹ gbaru tsabalangu. Yọ búru ẹphe b'a kwakọberu ẹke ono, gbaru tsabalangu ono. <sup>18</sup> Ẹphe anọdujelephu ekfu l'ọ bú ẹphe katsua amama; l'ọ bú ẹphe katsua amama. Okfu, shi ẹphe l'ọnu abujeru mkpọkoro okfu. Ẹphe egudeje iphe ono, ẹgu iya enwu ẹphe raphuraphu l'ẹhu, riwaru ẹphe arị l'ẹhu ono gbaa ọnya; hata ndu ono, bughokwadia bẹ ẹphe nahuru ndiphe ono, eshiswe ọzo, ẹphe l'ẹphe shi búru iphe lanu ono. <sup>19</sup> Ẹphe ekweje ẹphe ụkwa: l'onye emewa iphe ẹphe ezi búlephu iphe, dụ onye ọbu mma bẹ ọo-nọduje eme. Obenu l'ẹphebedua l'ishi onwẹphe te gbe búkwa l'ẹphe nwe onwẹphe.



Ẹphebedua bu ohu umere, rehururu erehu ono, ẹphe anọduje eme ono. Ke l'ọ bu iphe eme madzu eriri be onye obu bu ohu iya. <sup>20</sup> Ndu ono nwekwaru-a teke ẹphe shi maru Nnajiufu ayi, bu Jisosu Kuráiyisutu ogbodo amaru; bu iya bu Onye Ndzota ayi ono. Mbụ; ẹphe te eshihe ẹjo ọzo ono, emerushije unwu eliphe emerushi ono. A nonyalephu; ẹjo umere ono, ẹphe shi hawa ememe ono; ala azu bya eria ẹphe arị l'ẹhu ọdo; ka ẹphe ike; mee ẹphe eriri. Ọ kwa iya bu l'onodu onye ono abya aka ẹji; karia ẹge ọ dughawa l'odungu. <sup>21</sup> Mbụ l'agha: ọ ga kakwaru onye ono mma l'ẹ to mabukpoonu ọzo, bu: madzu -shia ya; Nchileke agua ya l'onye doberu ẹka ndoo; karia l'onye ono matsaru ọzo ke Nchileke; meebe bya ala azu; haa omeje ekemu ono, Nchileke turu iya ono. <sup>22</sup> Ọ kwa iya bu l'iphe ono, aanmaje l'etu ono be reru l'ẹhu onye obu; mbu etu ono, aanmaje; su: "Le madzu bu nkuta laru azu l'enwa iya." Etu ọdo aburu: "Ezi, a ghugeeru ẹhu; yo je agwo onwiya l'epoto." Ọ bu ẹge ono be ndu ono du.

### 3

#### *Uboku ke Nnajiufu*

<sup>1</sup> Ndu mu yeru obu; owaa ekweekwa ekwo-  
 ozi ẹbo, mu dewaru nu unu. L'ime ekwo-  
 ozi labu ono be mu dewaru; gude yeshiru unu oku;  
 nyataru unu t'unu riye oriri iphemiphe obule  
 ono, e ziru unu ono. <sup>2</sup> Unu nyatajeka okfu ono,  
 ndu nkfuchiru Nchileke kfuru le teke ndiche ono;  
 mbu ndu ono, du nsọ ono. Unu anyatakwapu

iphe ono, Nnajiufu, bu Onye Ndzota shi l'eka ndu ishi-ozii iya zia unu ono. <sup>3</sup> Iphe, e-bebekpoodu doo unu enya bu le temanu te mgboko-a gvụ; b'o nwekwaru ndu e-mekochaa buru ndu e-ta adujedu ike kpade onwephe l'egu ejo iphe, enwu ephe raphuraphu l'ehu. Iphe ephe a-noduje eme bu l'ephe a-noduje aja unu ewena. <sup>4</sup> Ephe ekfushi: "L'ephe etukwa le Jisusu kweru unu ukwa le ya a-bya odo. ?Nanuhunu iya obu nta-a? Nna ephe oche phe nwushihukotaakwaru l'ephe ha; to byakwa. Iphemiphe obule adulekwaa ege o du keshinu Nchileke keru mgboko byeye nta-a; e to dukwa iphe gbanwejeru nu. ?Ngunu mehunuru iphe e to byahedu obu?" <sup>5</sup> Ndu ono be lebezichacharu enya jika jinyia enya l'ephe ta aridu oriri iphe ono, Nchileke meru teke ndiche ono. L'o bulekwaphu okfu, Nchileke kfuru l'onu kpau b'o gude mee igwe; me ali. Ali shi le mini bya anodu; yo buru mini ono meru iphe a no ndzu le mgboko. <sup>6</sup> Odo aburu le Nchileke meru; igwe achia mini; rigbushikota iphe shi nodu le mgboko ophu shi nodu teke ono; yo buru kpurupyata. <sup>7</sup> Igwe owaa, ayi no le mkpuli iya-a; me ali owaa, ayi dzoberu okpa-a be bukwa Nchileke ono be gude okfu-onu iya sede iya t'o nodu jeye mboku oku e-kepyashi iya. Mboku ono, oku e-ke iya ono bu mboku oke ikpe Nchileke. O bu mboku ono be aa-nma ndu e-ta anuduru iya okfu ikpe; mee ephe; ephe aburu kpurupyata.

<sup>8</sup> Obenu l'agha; ndu mu yeru obu; o nweru iphe lanu, unu a-tube nvo. Iphe obu bu le Nnajiufu ono ta dukwa l'o bu ayibedua.

L'ɛnya nk'iya bɛ ujiku lanu dulekwa iya-a l'ɔ bu unukurunu afa; unukurunu afa adu iya l'ɔ bu ujiku lanu. <sup>9</sup> Iphe ndiphe ahajeru ari bu le Nnajiufu anonukawa anono; l'abyabya ono, o kweru ukwa le ya a-bya ono b'e to byahedu. Obenu l'e to dudu ege ono. Iphe o kweru ukwa iya b'o mefutajekwa. Iphe kparu iphe e to byadu keshinu ono bɛ bukwa nshi b'o taru unu. E to dudu onye du iya t'o laa l'iyi. Iphe du iya mma bu t'onymonye obule taa onwiya uta iphe du eji, o meru; ghaa umere lakfuta yɛbe Nchileke.

<sup>10</sup> Iphe e-dolephu unu ɛnya bu le Eswe ke Nnajiufu a-tukwa madzu l'ukfu l'ɔ bu abyabya onye iphura. Mboku ono bɛ igwe e-deru girigirigiri; mihu. Iphemiphe obule, nokota l'igwe: mkpo-kpodo; me onwa; me ɛnyanwu bɛ oku e-kekota. Mgboko kparamkparam me akanya, ndiphe seru kube l'ime iya bɛ oku e-kepyashikota. <sup>11</sup> Oo ya bu; keshinu unu mawaru l'iphemiphe obule, nokota le mgboko-a bukota iphe oku e-kepyashikota; unu kwabekwaruphu onwunu ɛnya; meje umere, gbaru unu l'ememe. Unu nujeru Nchileke okfu; unu eworu ndzu unu l'ɔ ha ye iya l'eka; t'o bukotaru nk'iya. <sup>12</sup> Unu chileruphu ɛnya ye l'uzo; ngaberu mboku, Nchileke a-bya emebyia mgboko-a. Unu gude okpoma unu l'ɔ ha; kebe ehuru; l'ejeru Nchileke ozi; te mboku ono byakebe egwegwa. Mboku ono bɛ Nchileke a-tu oku l'igwe; okpomoku a-kari eka; k'ophu iphe bu mkpo-kpodo; me onwa; me ɛnyanwu a-dazeshihukota. <sup>13</sup> Obenu le Nchileke kwekwaru ayi ukwa le ya e-mefuta

igwe ọphungu; mę mgboko ọphungu ẹke buphu ndu doberu ẹka ndoo l'ifu yebe Nchileke bu ndu e-buru iya nu nwenkinyi. Yọ buru mgboko ọphungu ono be ayi ele ẹnya iya obu.

<sup>14</sup> Oo ya bu; ndu mu yeru obu; keshinu unu ele ẹnya mboku ono; unu keshijekwa ẹhu; mee t'unu dẹbe mma; t'ẹ b'o nwe iphe aata unu uta iya l'ifu Nchileke. Unu le Nchileke adu le mma. <sup>15</sup> Unu nyatakwa l'iphe meru iphe Nchileke atakwadu nshi; ngabekwadu; to mebyiwa mgboko bu loomekwadu te ya haaru unu uzo t'unu bya te ya dzoo unu. O kwaphu iphe ono be nwanna ayi Polu, ayi yeru obu dehaakwaruphu unu lekwo-ozu, o detaru unu. Yọ buru Nchileke be nuru iya mmamiphe, o gude dee ya. <sup>16</sup> L'iphe bu ekwo-ozu, o deru lo ha be o kfukotakwaru okfu iphe-a, e-mekochaa mee nuwa l'iphe bu ẹke o kfuru okfu gbaa okpa l'iphe-a. Iphe ono, Polu deshiru ono nwekwaru ndu ọphu te edofujedu madu ẹnya. Yọ buru iphe ono kparu iphe ndu ẹ-ta madu iphe; mbu ndu ẹ-te vudoshidu ike lekwekwe, ẹphe kweru ke Nchileke ewojeru iya ghaa igharafu, buhukwaa ẹge ẹphe aghashije igweligwe iphe odo, e deru lekwo okfu Nchileke. Yọ buru ẹge ono be ẹphe eshije; gude ẹka ẹphe; meta o-la-l'iyi tukobe onwephe l'ishi.

<sup>17</sup> Oo ya bu; ndu mu yeru obu; keshinu ọphu unu vuwa uzo makotaru iphemiphe ọbule ono; unu kwabekwaru onwunu ẹnya te ndu ẹjo-uboku ono be eduswe unu; t'ẹphe be eme t'unu kweta lejo-ire ono, ẹphe anoduje adzushi ono be bu okpobe okfu. T'ẹphe be eme t'okpa

chifu unu; t'unu lufu l'okpuberu okfu ono, unu vudo vudoshia ike ono; zahaa okpobe okfu ono, unu kwetaru ono. <sup>18</sup> Iphe unu e-mechia bu t'unu maru Nnajiufu ayi, bu Jisosu Kuráyisutu, bu iya bu Onye Ndzota ayi. Unu akafua ya omaru okpobe amaru l'eje. Unu amuta umere iya; k'ophu unu a-du ege o du. O kwa yebedua nwenkinyi bu onye aa-nodu akwabe ugvu mboku-mboku gbururu jeye le tutu yoyo. Ono kwa ege o du.

**Bayiburu Ikwo**  
**Ikwo: Bayiburu Ikwo Bible**

copyright © 2014 Wycliffe Bible Translators, Inc.

Language: (Ikwo)

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 21 Feb 2024 from source  
files dated 29 Jan 2022

3867ef4e-3384-5ab4-a937-63476bb8a7bb